

საქართველოს მთავრობის

დადგენილება №428

2016 წლის 7 სექტემბერი

ქ. თბილისი

„ტყითსარგებლობის წესის დამტკიცების შესახებ“ საქართველოს მთავრობის 2010 წლის 20 აგვისტოს №242 დადგენილებაში ცვლილების შეტანის თაობაზე

მუხლი 1

„ნორმატიული აქტების შესახებ“ საქართველოს კანონის მე-20 მუხლის მე-4 პუნქტის შესაბამისად, „ტყითსარგებლობის წესის დამტკიცების შესახებ“ საქართველოს მთავრობის 2010 წლის 20 აგვისტოს №242 დადგენილებაში (სსმ, №103, 24/08/2010) შეტანილ იქნეს ცვლილება და დადგენილებით დამტკიცებული წესის:

1. 46² მუხლის პირველი პუნქტი ჩამოყალიბდეს შემდეგი რედაქციით:

„1. მაღალმთიანი დასახლების საწარმოს სტატუსის მქონე ან მაღალმთიან დასახლებაში მუდმივად მცხოვრებ დაინტერესებულ პირებს შეუძლიათ, სააგენტოს მიმართონ განაცხადით, სააგენტოს მიერ შესაბამის მუნიციპალიტეტში სპეციალური ჭრით დასამზადებელი მერქნული რესურსის 12 თვის განმავლობაში არანაკლებ 100 მ³-ისა და არაუმეტეს 1000 მ³-ის შექმნის მიზნით (ვადის ათვლა დაიწყება შესაბამისი ნასყიდობის ხელშეკრულების დადებიდან). განაცხადს, საწარმოს შემთხვევაში, თან უნდა ახლდეს მაღალმთიანი დასახლების საწარმოს სტატუსის, ხოლო ფიზიკური პირის შემთხვევაში – მაღალმთიან დასახლებაში მუდმივად მცხოვრები პირის სტატუსის დამადასტურებელი საბუთი.“.

2. 46² მუხლის მე-4 და მე-5 პუნქტები ჩამოყალიბდეს შემდეგი რედაქციით:

„4. სააგენტოს მიერ სპეციალური ჭრით დასამზადებელი მერქნული რესურსის ამ მუხლის პირველი პუნქტით გათვალისწინებულ პირთან ნასყიდობის ხელშეკრულება, რომლითაც განისაზღვრება მერქნული რესურსის მიწოდების ვადები და ნასყიდობის ხელშეკრულებასთან დაკავშირებული სხვა პირობები, ფორმდება სააგენტოს მიერ ხე-ტყის დამზადების მომსახურების გაწევის თაობაზე სახელმწიფო შესყიდვების შესახებ ხელშეკრულების გაფორმების ან უშუალოდ, სააგენტოს მიერ ხე-ტყის დამზადების შესახებ გადაწყვეტილების მიღების შემდგომ. ხე-ტყის დამზადების მომსახურების შესყიდვის შემთხვევაში, დამამზადებელი სააგენტოს მიღება-ჩაბარების აქტის საფუძველზე აბარებს დამზადებულ მერქნულ რესურსს, მრგვალი ხე-ტყის (მორის) და საშემე მერქნის სახით.“.

5. პირდაპირი მიყიდვის წესით მერქნული რესურსის გაცემის შემთხვევაში, საწარმო ან ფიზიკური პირი მრგვალი ხე-ტყისა (მორის) და საშემე მერქნისათვის იხდის მერქნული რესურსის მიწოდების მომენტისათვის სახელმწიფო საექსპერტო დაწესებულების მიერ შესაბამის კვარტალში საექსპერტო დასკვნის საფუძველზე განსაზღვრულ შესაბამის საორიენტაციო ფასს, რომელსაც ემატება განსაზღვრული ფასის 15%. ამ პუნქტით დადგენილი ფასი მერქნული რესურსის შემქმნის მიერ გადახდილი უნდა იქნეს მერქნული რესურსის გადაცემამდე. ამასთან, მთავარი სარგებლობის ჭრის შედეგად დამზადებული წიწვოვანი მერქნული რესურსის არანაკლებ 75%-ზე გადაიხდება მრგვალი ხე-ტყისათვის (მორისათვის) დადგენილი ფასი, შესაბამისად, 25%-ზე – საშემე მერქნისათვის დადგენილი ფასი; ფოთლოვანი მერქნული რესურსის შემთხვევაში – არანაკლებ 60%-ზე გადაიხდება მრგვალი ხე-ტყისათვის (მორისათვის) დადგენილი ფასი, შესაბამისად, 40%-ზე – საშემე მერქნისათვის დადგენილი ფასი. მოვლითი (გავლითი) ჭრით დამზადებული წიწვოვანი მერქნული რესურსის არანაკლებ 65%-ზე გადაიხდება მრგვალი ხე-ტყისათვის (მორისათვის) დადგენილი ფასი, შესაბამისად, 35%-ზე – საშემე მერქნისათვის დადგენილი ფასი; ფოთლოვანი მერქნული რესურსის არანაკლებ – 50%-ზე გადაიხდება მრგვალი ხე-ტყისათვის (მორისათვის) დადგენილი ფასი, შესაბამისად, 50%-ზე – საშემე მერქნისათვის დადგენილი ფასი.“.

მუხლი 2

დადგენილება ამოქმედდეს გამოქვეყნებისთანავე.



